

現代生活藝術系列

# 華嚴經疏論纂要

117

普賢行願品別行疏鈔纂要

并序

華藏淨宗學會印贈

大方廣佛華嚴經普賢行願品別行疏鈔纂要卷第  
一百之十七 并序



敕太原府大崇福寺沙門澄觀撰別行疏  
終南山圭峯草堂寺沙門宗密述隨疏鈔

閩鼓山私淑比丘道需纂要

○將釋此經。大分四段。第一總標大部名意。第二歸敬請加。第三開章釋文。第四慶讚迴向。初中又四。第一通敘法界爲佛法大宗。第二大方廣佛華嚴經者下。別歎此經以申旨趣。第三然玄籙百千下。教起由致慶遇希奇。第四大方廣者

下。畧釋總題。令知綱要。最初便敘法界者。以是此經之所宗故。又是諸經之通體故。又是諸法之通依故。一切衆生迷悟本故。一切諸佛所證窮故。諸菩薩行自此生故。故初頓說。不同諸家有漸次也。謂權實不同。隨宗異故。文中有三。一約法以明。二約人以顯。三法喻結歎。今初序曰。大哉真界。萬法資始。包空有而絕相。入言象而無迹。妙有得之而不有。真空得之而不空。生滅得之而真常。緣起得之而交映。

〔鈔〕文二。初一句總標體性。二別明體相。今初大哉

眞界者。兼下句。借周易乾卦文勢用之。彼彖辭云。大哉乾元。萬物資始。乃統天。謂乾卦有四德。卽元亨利貞。以乾是卦名。元是卦德。以是其首德。故連乾稱之。云大哉乾元者。陽氣昊大。乾體廣遠。又以元大始生萬物。故云大哉。萬物資始。乾元稱廣大之義者。以萬象之物。皆資乾元而得生始。所以得稱廣大。乃統天者。以其至健而爲物始。以此能統領於天也。天是有形之物。以其至健。能總統有形。是乾元之德也。今此則借初二句文勢。而所宗不同。彼指乾元。此明眞界。彼指萬物。不過天地之內。

此言萬法。總該世出世間。故不同也。言大哉者。是發語之端。仰歎之詞也。眞界者。卽眞如法界。法界類雖多種。統而示之。但唯一眞法界。卽諸佛衆生本源清淨心也。故下立宗云。統唯一眞法界。卽是一心。又起信云。所言法者。謂衆生心。是心卽攝一切世出世間法。權教以八識爲心。一向有爲生滅。不得爲體。今明一法界心。準起信論。於此一心。方開眞如生滅二門。此明心。卽一眞法界。故此總標爲體性也。兩宗心義。下當廣明。○萬法資始下。二別明體相也。於中三。一明爲諸法本。二明包遍離

情。三。明。妙。用。自。在。今。初。資。者。假。藉。之。義。無。有。一。法。不。是。本。心。所。現。無。有。一。法。不。是。真。界。緣。起。無。有。一。法。先。於。法。界。由。是。萬。法。資。假。真。界。而。得。初。始。生。起。也。然。一。法。界。心。成。諸。法。者。總。有。二。門。一。性。起。門。二。緣。起。門。關。鍵。中。約。親。疎。也。性。起。者。性。卽。上。句。真。界。起。卽。下。句。萬。法。謂。法。界。性。全。體。起。爲。一。切。諸。法。也。法。相。宗。說。真。如。一。向。凝。然。不。變。故。無。性。起。義。此。宗。所。說。真。性。湛。然。靈。明。全。體。卽。用。故。法。爾。常。爲。萬。法。法。爾。常。自。寂。然。寂。然。是。全。萬。法。之。寂。然。故。不。同。虛。空。斷。空。頑。凝。而。已。萬。法。是。全。寂。然。之。萬。法。故。不。同。

遍計倒見定相之物。擁隔質礙。既世出世間一切諸法。全是性起。則性外更無別法。所以諸佛與衆生交徹。淨土與穢土融通。法法皆彼此互收。塵塵悉包含世界。相卽相入。無礙鎔融。具十玄門。重重無盡。良由全是性起也。縱諸緣互相資發。就此門中。緣起亦成性起。約此義故。諸佛常普遍一一塵中。說華嚴法界。永無休息。故晉經有性起品也。二緣起門有二。一染緣起。二淨緣起。染者。謂諸衆生中。雖全有如上真性。及性所起過塵沙之善法。良由迷之。不自證得。便顛倒遍計。別執過塵沙之惡。

法。故云染緣也。釋此便爲二門。一無始根本。二展轉枝末。根本者。謂獨頭無明也。言獨頭者。迷本無因。橫從空起。不同餘法。展轉相因。此復有二。一迷真。二執妄。迷真者。不識自體法身真智。故十地品云。於第一義諦不了。故曰無明執妄者。卽不識本自身心。卽法爾自然。別執妄心。及一切質礙諸法也。故圓覺經云。妄認四大爲自身相。六塵緣影爲自心相。故名無明也。二展轉枝末者。有三種。一由前獨頭無明。故起種種煩惱。二由煩惱。故造種種業。三由業成。故受六道種種生。死諸苦果。故佛名



經云。獨頭無明爲煩惱種。又云。此三障者。更相由藉。因煩惱故。以起惡業。惡業因緣。故得苦果。一從無明起煩惱者。唯說煩惱麤相。卽貪瞋癡。謂旣妄認四大五蘊爲自身心。卽自然貪一切榮樂之事。欲以潤之。瞋一切違情之境。恐損害之。愚癡之情。種種計拔。如上煩惱。皆由輒妄而起也。二從煩惱造業者。旣貪瞋猛盛。卽造十惡等業。或貪來生富樂之報。造諸善業。或厭下苦麤障。欣上淨妙離。修四禪八定不動業。由迷第一義故。善惡不動。俱是有漏染業也。三從業受報者。然聲響形影之報。纖

毫不差。由前惡業成。則有地獄餓鬼畜生種種苦報。由前善業成。則有四洲及六欲天等種種樂報。由前不動業成。則有色界四禪。無色四空等種種差別之報。所受苦樂之身。是別業正報。所居勝劣器界。是共業依報。既未返本還源。並非究竟。由是三界五道。妙高鐵圍。四海七金。日月水陸。山河大地。萬象森羅。丘陵坑坎。雜穢充滿。十方各各差別。乃至三千大千世界。如是無量無邊品類。有情卽生老病死。器界卽成住壞空。劫劫生生。遷流不絕。皆是染緣起也。故大經云。心如工畫師。能畫諸世。

間。五蘊悉從生。無法而不造。又不增不減。經云。法  
身流轉五道。名曰衆生。勝鬘經云。不染而染。起信  
論云。無明熏真如。成諸染法等。二淨緣起者。亦有  
二義。一分淨。二圓淨。分淨有三。一。聲聞。二。緣覺。三。  
權教六度菩薩。且聲聞者。謂有衆生。聞小乘教。知  
前三界不安。皆如火宅。厭患心生。欲求出離。修五  
停心觀。七方便等。斷四諦下分別煩惱。得初果。進  
修漸斷。俱生煩惱。乃至證阿羅漢果。卽四果四向  
是也。緣覺者。亦由知前三界過患。根性猛利。遇緣  
見性。成辟支佛。於中有麟角部行之異。然上二乘。

唯除我執。未除法執。唯斷煩惱障。未斷所知障。唯證生空。未證法空。故云分淨。權教菩薩等者。聞定五種性。定三乘教。信唯識理。不執我法。發三心四願。修六度萬行。斷二障。證二空。卽三賢十聖。若身若智。及諸功德。并所居國土也。言分淨者。以未聞圓頓實教。但守所習權宗。權宗畢竟無有實果。故出現品云。假使有諸菩薩。於百千億那由他劫。具修六波羅密。及三十七菩提分法。若未聞此不思議大威德法門。或時聞已。不信不順。不悟不入。不得名爲真實菩薩。卽知若守權宗。定無稱性究竟。

之果也。良由但云聖淨。凡不淨。斷障後方淨。未斷時不淨。穢土不淨。別有淨土等。故云分淨。權實兩宗不同。如大疏玄談中廣辨也。二圓淨者。亦有二門。一頓悟。二漸修。頓悟者。翻前根本無明也。謂有圓機。聞此圓教。知一切衆生皆如來藏。無別八識生滅之種。煩惱生滅。卽是菩提涅槃。一切國土。染相本空。無非淨土。初發心時。便成阿耨菩提。見一切衆生。皆亦如是。故出現品云。菩薩應知自心。念念常有佛成正覺。如自心。一切衆生心。亦復如是。準此義故。卽頓悟時。徹於法界。若自若他。唯見清

淨。不見更有染法也。既不迷真。執妄。故云翻前無明。漸修者。謂雖圓頓悟解。而多劫已成顛倒妄執。習已性成。難爲頓盡。故須背習修行。契合本性。此復有二。一離過。二成德。離過者。翻前展轉枝末三障也。既自識真淨法身。靈鑒真心。即不妄認四大緣慮之軀。本因煩惱而爲此身。既不認此身。即貪瞋自息。貪瞋既息。即不造業。既無有業。即無三界六道苦樂之報。故云離過也。言成德者。既無障惱。則一向稱性修行。顯發性上塵沙功德妙用。然非謂先離過盡。然後成德。即心境離過之時。即稱性

念念圓修萬行。念念圓成萬德。故雖初發心。便同正覺。而不礙行布。行位歷然。然且行行交參。位位融攝。因該果海。果徹因源。斷障。卽與一切衆生同體。普斷成佛。卽與一切衆生同體。普成。故出現品云。如來成正覺時。普見一切衆生成正覺。普見一切衆生般涅槃。卽此圓教中四十二位。若賢若聖。若心若境。若依若正。若人若法。竝是圓淨緣起之法也。言緣起者。由本因中聞圓教。信圓法。發圓解。起圓行。圓除諸障。圓證法界。旣藉此諸緣修證。故言緣起。證時卽見凡聖皆然。故言圓淨。故大經云。

若人欲了知三世一切佛。應觀法界性。一切唯心造。法華經云。佛種從緣起。起信論云。眞如熏無明。成諸淨法。統而言之。則淨緣起門。翻前染緣起門。以合前性起門也。然此華嚴圓宗。具別教一乘。同教一乘。二義。上性起門。卽別教義。迴異諸教故。上緣起門。卽同教義。普攝諸教故。大疏玄談。全揀全收。全揀諸宗。卽別教性起義。全收諸宗。卽同教緣起義。然約機約法。故開二門。旣入法融通。二亦交徹。二門不二。統爲華嚴圓宗。所顯眞界生起萬法之義門也。○二明包遍離情者。包空有而絕相。入



言象而無迹。上句包含所詮法。下句遍能詮教。言包空有者。謂性無一物。卽名包空。而靈心不昧。卽絕空相。性具萬德。卽名包有。德皆是性。卽絕有相。如瑩淨明鏡。空無一物。是名含空。而明鑒朗徹。故絕空相。明鏡本具能現衆像之德。是名包有。能現卽是明鏡。故絕有相。以喻對法。義目分明。問。文云。絕相者。爲絕空有之相。爲絕真界之相。答。相之極也。極於空有。但於真界而絕空有之相。卽真界當體便是絕相也。言入言象而無迹者。此明真性不離言教之中。然且絕蹤迹也。如水遍入諸波。無別

水相。不同人入屋中。別有人相。故曉公起信疏序云。玄之又玄。豈出萬象之表。寂之又寂。猶在百家之談。此證入言象也。非象表也。大經云。法性遍在一切處。一切衆生及國土。三世悉在無有餘。遍入也亦無形相而可得。無迹也○三妙用自在者。妙有至交映是。妙有得之而不有。真空得之而不空者。不見真界之人。聞說三乘因果。則起心取相而求。聞說諸法皆空。則不喜化生嚴土。若得真界。卽知一切皆同真界。不空不有也。於有處見之。之字指於真界有則與之不異。故有卽不有。於空處見之。空則與之

不異。故空卽不空。不空故自然不失修行。不有故。自然不取於相也。生滅得之而眞常者。生滅之法。不出遍計所執。及依他緣起。若得眞界。卽知遍計。如繩上蛇。本無所有。全是麻繩。旣無法。可生可滅。但是圓成眞常也。依他無性。攬緣而起。故卽生無生。卽滅無滅。如繩無自性。全是於麻。故依他卽圓成眞常也。况三性皆無性。但是法界。眞常居然可見。然此宗云。依他不唯依衆緣之他。全依眞界而起。爲依他也。設假因緣。因緣亦依眞界。故關鍵中。說法界起諸法時。有性起門。及緣起門。言緣起得。

之而交映者。先約義緣起相由。後約法也。塵沙法數。無非法界緣起。故緣起之法。皆含寂照。如觀一塵。既全是法界。卽寂照具足。如鏡明而復淨。故能現多鏡入已一中。此一鏡又入多鏡之內。交相映入。一鏡既爾。餘鏡皆然。一塵既同法界。寂而又照。故能合一切法入已一中。此一塵又入一切法中。交相映入。一塵既爾。一切皆然。重重交映而無盡也。皆由真界故爾。一約法以明竟。

○第二約人以顯。文中二。初約佛顯。後約王顯。今

初

我佛得之。妙踐真覺。廓淨塵習。寂寥於萬化之域。動用於一虛之中。融身利以相舍。流聲光以遐燭。

〔鈔〕文三。一智德。二斷德。三恩德。今初。妙踐真覺者。踐謂履踐。真覺卽清淨本覺。故妙嚴品云。已踐如來。普光明地。彼歎菩薩履踐佛境。今明如來履踐淨覺。深淺不同。但引之以證踐字。依起信論。覺有三種。一者本覺。二者始覺。三者究竟覺。是究竟覺。故名真覺。見始本異。不名妙踐。迺無二故。方名妙踐。衆生不悟真界。履踐六塵五欲。如來契合本源。故踐真覺成聖德也。佛是覺者。卽指於人。真覺是

所踐之覺。卽指於法。若以人契法。能所不忘。雖踐不名爲妙。今得真界融之。能所契合。故名妙踐。○  
二斷德者。廓淨塵習。卽障無不寂也。廓謂空廓。淨謂清淨。塵謂障垢。卽煩惱所知二障也。然二障從麤至細有三。一現行。二種子。三習氣。習氣微細難除。尙皆廓淨。况種現耶。大疏云。蕩無纖塵。○三思德。寂寥至遐燭。寂寥於萬化之域。動用於一虛之中者。上句用而常寂。下句寂而常用。寂者無聲。寥者無色。萬化者。卽一切法從緣假有。如幻化也。域者。疆域。一虛者。卽一真虛寂也。融身刹以相合者。

依正無礙也。然依正交徹。義有六句。一依內現依。謂塵含世界。現相品云。佛刹微塵數。如是諸刹上。能於一念中。一一塵中現也。二正內現正。謂毛孔中現佛。經云。如來於一毛孔中。一切刹塵諸佛坐。菩薩衆會共圍繞。演說普賢之勝行也。三正內現依。謂毛孔中現刹。僧祇品云。於一微細毛孔中。不可說刹次第入毛孔。能受彼諸刹。諸刹不能遍毛孔。四依內現正。謂塵中現佛。下文云。於一塵中塵數佛。各處菩薩衆會中。無盡法界塵亦然。深信諸佛皆充滿。五依內現依正。謂塵中現佛身及刹。經

云。一。一塵中無盡身。復現種種莊嚴刹。六正內現  
依正。謂毛孔中現全佛身及刹。經云。一毛孔內難  
思刹。等微塵數種種任。一一皆有遍炤尊。在衆會  
中宣妙法。五六二句。具彰相卽相入。方成融身刹  
也。言相含者。以稱性故。隨舉其一。必全收一切也。  
○流聲光以遐燭者。卽流布聲教之光也。故十地  
論。有教光智光也。亦可聲是聲教。光是光明。故大  
經云。佛放光明遍世間。炤耀十方諸國土。演不思  
議廣大法。永破衆生癡惑闇。遐者。遠也。燭者。炤也。  
十方刹土。機感卽聞。不局三千界內。故云遐燭也。



○第二約王顯

我皇得之。靈鑒虛極。保合大和。聖文掩於百王。淳風吹於萬國。敷玄化以覺夢。垂天真以性情。

鈔當時卽德宗皇帝。靈鑒虛極者。謂英靈鑒達。虛無太極之道也。靈鑒。智也。虛極。理也。保合大和者。周易乾卦彖辭云。乾道變化。各正性命。保合大和。乃利貞。謂無爲而化。上順於天。下合於人。故聖人無心。以百姓心爲心。旣德合天地。中應人倫。反朴還淳。三才一貫。爲大和也。和爲大樂。故禮記云。大樂與天地同和。大禮與天地同節。論語云。用和爲

貴。以禮節之。意取禮樂備也。聖文掩於百王者。約時豎論。德超三古也。上古三皇。中古五帝。下古三王。文謂經綸天地。故周易云。觀乎天文。以察時變。觀乎人文。以化成天下。君臣父子。尊卑上下。謂之人文。此則德宗聖文明著也。淳風吹於萬國者。約處橫說道。貫萬邦也。謂淳朴之風。萬國遍布。如春風一舉。百卉芳菲。故有詩云。唯有春風無厚薄。貧家桃李也成陰。言敷玄化。以覺夢者。謂敷暢玄妙。佛法風化。教令。警覺衆生。無明大夢。故大經云。譬如闇中寶。無燈不可見。佛法無人說。雖慧莫能了。

卽令悟眞性。永斷無明也。言垂天真以性情者。禮記云。人生而靜。天之性也。感物而動。性之欲也。欲卽情欲。若以情情於性。性則妄動爲情。若以性性於情。情則眞靜爲性。今垂無爲之化。令息妄動之欲情。合於天真之靜性也。二約人以顯竟。

○三法喻結歎

是知不有太虛曷展無涯之炤。不有眞界。豈淨等空之心。

鈔喻中。空無日而不顯。如黑月夜行。不敢動步。及乎日出。方知本空。日無空而不舒。若遇日有物遮障。日卽不舒。要得空無雲翳。日始還炤。故空日

互相假也。理實日炤亦有分量。但取人間目覩不及。故曰無涯。大經云。譬如孟夏月。空淨無雲翳。赫日揚光輝。十方靡不炤。法中真界與等空之心亦然。若無真界。何以展心智。若無心智。何以緣真界。三昧經云。等空不動智也。三法喻結歎竟。

已上第一通敘法界爲佛法大宗竟

○第二別歎此經以申旨趣。文中三一標歎。二釋歎。三結歎。今初

大方廣佛華嚴經者。卽窮斯旨趣。盡其源流。故恢廓宏遠。包納冲邃。不可得而思議矣。

鈔斯者。指如上融攝旨趣也。良由窮此融攝旨趣。故得恢廓宏遠等。恢廓。謂曠蕩義。宏遠。則周遍義。包納。則合容義。卽當法界觀中第三周遍合容觀也。冲。謂冲淡。遂。謂幽邃。卽遍容二門。皆稱理淡遂難見也。不可得而思議者。謂理淡事廣。俱不思議。况一多卽入。故宜詞寥慮絕。故龍樹菩薩判維摩經爲小不思議經。芥納須彌。毛吞巨海。指華嚴經爲大不思議經。塵含法界。念攝僧祇。此有四義。下解品題中當廣明之。

○第二釋歎。文中有六。一本源淡妙。二成益頓超。三詮旨圓融。四說儀淡奧。五約器。明非器不測。

六指例顯當機益淡今初

指其源也。情塵有經。智海無外。妄惑非取。重玄不空。四句之火莫焚。萬化之門皆入。冥二際而不一。動千變而非多。事理交徹而雙亡。以性融相而無盡。若秦鏡之互照。猶帝珠之相含。重重交光。歷歷齊現。

鈔文三一。標指其源。二正明淡妙。三喻結難思。今初。謂欲明功用。故先標源也。二正明淡妙。文中有六。一融情智。二融真妄。三顯四句百非。四泯真俗。一多。五融拂事理。六融攝事相。○今初。情塵有經。智海無外。經有二義。一約喻。二約法。喻卽塵含大。

千經卷。如情念含圓明大智。文在出現品。如下具引。還源觀中釋云。塵卽衆生妄念。經卽大智圓明。智體旣其無邊。故曰量同千界。二約法者。卽經是常義。明情塵生滅之念。智推體卽真常。故次句云。智海無外。若情塵非常者。卽智海有外也。以外有情塵故。旣外無情塵。故知情卽常也。然迷悟更依真妄相待。若求真去妄。如弃影勞形。若體妄卽真。似處陰下而影滅也。○二融真妄。妄惑非取重玄不空者。然惑與取。蓋一義耳。今以稱性融通。惑乃非取。故科云。融真妄也。重玄不空者。文勢用老經。經

云。玄之又玄。故云重玄。彼意以虛無自然爲玄妙。恐滯情於此。遂拂迹云。又玄。若佛法中意。以空空爲重玄。卽空病亦空也。今意云。卽於空空。便具恆沙德用。故云不空。大疏云。萬德有非有一源空不空。如海對虛明。天地同一色。此則空有交暎也。○三顯四句百非。四句之火莫焚萬法之門。皆入四句者。謂有無亦有無。非有非無。諸宗墮此。便成四謗。故大般若云。般若波羅密。猶如大火聚。四面不可取。取卽被燒。墮卽成謗。故須離之法中離四句。今明圓教所宗。諸法本來離過。觸向成德。四皆



法門。故云四句之火莫焚也。然成謗成門。四句不別。如何異耶。謂於四句中。執一斥餘。則句句皆病。如四人各執一句。或一人先後歷四句義是也。若四句存泯無礙。則句句皆門。一人一時而見四句也。問。依於何法而說四句。答。然所依法。謂真俗相對成四。卽法法皆具四也。依真俗二諦明四句者。一真隨緣故有。二緣無性故無。三上二句俱存故亦有亦無。四互奪俱泯故非有非無。又不是有無。是真性故。又約教者。謂詮生處。則俗有真無。涅槃則俗無真有。涅槃經云。空者。所謂生處不空者。謂大涅槃。此上猶約諸法以說。若尅

就眞性。亦有四句。一性是有。知覺不昧故。二性是無。無相無名故。三際去來今也三處內外中間求不得故。三性亦有亦無。上一二句同時故。四性非有非無。此有二意。一卽由上一二同時互相奪故。一時俱泯。二直指眞性不是有無。但是眞性也。言萬法之門皆入者。顯萬法也。萬者指於總數。其實該於一切。然一切法不出四句。諸宗以四句爲謗。故一切皆非。所以每論妙理。皆云離四句。絕百非。離於謗也。今旣四句成德。故萬法悉是妙門。曉公云。失意則所說皆非。得意則所說皆是。如見一塵。稱理推之。卽悟。

性空全體便見法界。故此一塵卽是入法界之門。一切皆爾也。○四泯真俗一多。冥二際而不一。動千變而非多。言二際者。謂真俗二諦。及生處涅槃。乃至諸佛衆生相待之法。皆是二際也。今且約二諦明之。真隨緣卽俗。俗無性卽真。故云冥也。二既冥合。卽應是一。以互奪故。離名數故。故亦非一。大經云。無中無有二。無二亦復無。三世一切空。是則諸佛法。仁王經云。於解常自一。是遣二也於諦常自二。是遣一也又二諦竝非雙。恆乖未曾各。一雙孤。鴈撲地。高飛。兩隻鴛鴦池邊獨立。動千變而非多者。泯一

多也。謂變動差別之法。全同真性。性無分限。故不是多。然亦非一。已在上句。故但舉非多。而實一多皆泯也。又可兩句共成真俗一多。謂冥二際是真。不一是泯真也。動千變是俗。非多是泯俗也。又冥二際是一。言不一。卽泯一也。動千變是多。言非多。卽泯多也。據此後義。以真爲一。以俗爲多。不同十玄門中。一多俱取事法故。○五融拂事理。事理交徹而雙亡者。交徹卽融。雙亡卽拂。此經所詮之事。必全理之事。所詮之理。必全事之理。故言交徹。然由交徹同時。故互相奪。二俱亡也。理卽事故。理已

泯也。事卽理故。事復亡也。○六融攝事相。以性融相。而無盡者。謂一一事相。皆攝理性。由性融之。故能包一切。能遍一切。重重無盡也。以性融相者。明重重之所以也。此則十玄門德用所因中。第四法性融通門意也。謂若唯約理。則但一味。無別相入。若唯約事。則互相礙。不能相入。今約事理融通。故得有斯無礙也。謂不異理之一事。全攝理性時。令彼不異理之多事。隨所依理。皆於一中現也。若一事攝理不盡。則理有分限失。若一事攝理盡。而多事不隨理現。則事在理外失。今旣一事全攝理性。

多事豈不於一中現。故經云。華藏世界所有塵。一  
一塵中見法界。見四法界寶光現。佛如雲集。此是如來  
利自在。言無盡者。正辨事事無礙。重重無盡。通十  
玄門故。此一句中。四字明所以。三字正辨重重也。  
大疏序云。理隨事變。則一多緣起之無邊。事得理  
融。則千差涉入而無礙。兩對皆上句明所以。下句  
正明事事無盡。又周遍含融觀中四句。一。一中一。  
二。一中一切。三。一切中一。四。一切中一切。○三喻  
結難思。若秦鏡至齊現者。鏡喻則兼前諸門交徹  
之意。以兩鏡相對。如事理二門。若取相入。展轉成

多。則亦喻事事無礙也。珠喻則唯喻融攝無盡。言秦鏡者。秦朝有鏡。能照人心。故朱鎰詩云。西國有秦鏡。其光世所希。照人見肝膽。鑒物窮幽微。今意取文涉稽古。又取至極之明。故云秦鏡。謂兩鏡互照。中置一燈。互相影入。交參無礙也。帝珠者。帝釋殿網之珠。明淨。一入多中。多入一中。重重無盡也。

○第二成益頓超

故得圓至功於頃刻。見佛境於塵毛。諸佛心內衆生。新新作佛。衆生心中諸佛。念念證真。

鈔於中二。初時處超。後因果超。今初。言故得至塵

毛者。上句時。下句處。時中言故得圓至功於頃刻者。由如上境界融攝微妙。故得信解悟入。有斯頓證。梵行品云。若諸菩薩能與如是觀行相應於諸法中。不生二解。一切佛法疾得現前。初發心時。卽得阿耨多羅三藐三菩提。知一切法。卽心自性成就慧身。不由他悟。言頃刻者。對諸教時劫。反顯可知。見佛境於塵毛者。處超也。準時中例。亦可云。若與如是觀行相應。不待上尋彌勒。西訪彌陀。卽一塵一毛。便見佛境。如斯文句。遍大部中。若要見者。卽前融身利六句中所引文是也。○二因果超者。



諸佛心內至證真者。然因果交徹義有四句。一衆生全在佛心中故。卽果門攝法無遺。故出現品云。如來成正覺時。於其身中。普見一切衆生成正覺。乃至普見一切衆生般涅槃。又佛性論第二如來藏品云。一切衆生悉在如來智內。故名爲藏也。故云。諸佛心內衆生作佛也。二佛全在衆生心中故。卽因門攝法無遺。故出現品云。菩薩應知自心。念念常有佛成正覺。何以故。諸佛如來不離此心成正覺故。如自心。一切衆生心亦復如是。悉有如來成等正覺也。三由前生佛互相在時各實非虛。則

因果交徹。隨一成佛。全在二心。四由生全在佛。則同佛非生。佛全在生。則同生非佛。兩相形奪。二位齊融。則無成佛及不成佛。故出現品云。譬如虛空。一切世界。若成若壞。常無增減。何以故。以虛空無生滅故。諸佛菩薩。亦復如是。若成正覺。不成正覺。亦無增減。何以故。菩提無相。無非相故。佛子。假使有人。能化作恆河沙等心。一一心。復化作恆河沙等佛。皆無形無相。如是盡恆河沙等劫。無有休息。佛子。於汝意云何。彼人化心化作如來。凡有幾何。如來性起。妙德菩薩言。如我解於仁所說義。化與

不化等無有異。云何問言。凡有幾何。普賢菩薩言。善哉善哉。佛子。如汝所說。設一切衆生於一念中。悉成正覺。與不成正覺等無有異。何以故。菩提無相故。若無有相。則無增減。佛子。菩薩摩訶薩應如是知。成等正覺。同於菩提。一相無相。釋曰。上來但以反覆相對。故有四句。而大旨不過因果交徹。亦可如文而見也。但衆生成佛之義。難以忍可於心。畧爲問答。問。此中成佛。爲約事成。爲約理成。若約事成者。何以云。同一性故。若約理成。何以云。成正覺耶。入涅槃耶。答。此是華嚴大節。若不對諸宗。難

以取解。今約五乘及五教而辨淺深。然諸衆生。若於人天教中觀之。具足人法二我。若於小乘教中觀之。但是五蘊實法。本來無我。若大乘始教法相宗。則說唯識所現。若無相宗。則說幻有卽空。人法俱遣。若大乘終教。唯如來藏。具恆沙性德。故衆生卽在纏法身。法身衆生。義一名異。猶據理說。若大乘頓教。則相本自盡。性本自現。不可說言成佛不成佛等。若依此宗。舊來成正覺竟。亦涅槃竟。非約同體。此成卽是彼成也。難曰。若爾。何故現有衆生。非卽佛耶。答。若就衆生位看者。尙不見唯心卽空。

安見圓教中事。如人迷東爲西。正報西故。若諸情頓破。則法界圓現。無不已成。猶彼悟人。西處全東。又難。若爾。諸佛何以更化。答。衆生不如是知。所以須化。如是化者。爲究竟化。如是化者。無不化時。故下結云。大悲相續。救度衆生。五教不同。皆聖言量。不可將教。就情識說。

○三詮旨圓融

一字法門。海墨書而不盡。一毫之善。空界盡而無窮。  
鈔 一字法門至無窮者。上句詮。下句旨。詮者。卽善財所遇第三善友海雲比丘云。我從彼佛。得此普

眼法門。受持讀誦。憶念思惟。假使有人。以大海量  
墨。須彌聚筆。書此無盡。廣大海藏。普眼法門。一品  
中一門。一門中一法。一法中一義。一義中一句。乃  
至少分。尚不可得。何況盡能具足書寫。釋曰。乃至  
少分者。卽一字也。以能詮一字。全卽所詮法界。故  
卽無盡。不同諸宗。能詮定非所詮也。一毫之善。空  
界盡而無窮者。卽十種行願。皆結云。如虛空界無  
有盡等。如初禮佛行願結云。以虛空界不可盡故。  
我此禮敬。無有窮盡。餘九例然也。

○四說儀淡奧

語其定也。冥一如於無心。卽萬動而恆寂。海湛眞智。光含性空。星羅法身。影落水。圓音非扣而長演。果海離念而心傳。萬行忘炤而齊修。漸頓無礙而雙入。

〔鈔〕文中有五。一明至定。二明妙智。三明眞身。四明說本。五明修證。今初○語其定也。至恆寂。科云至定者。卽慧之定也。夫定有多種。或邪。或正。大乘小乘。有漏。無漏。有慧。無慧。今且隨要而說。總有二種。一事。二理。如遺教經云。制之一處。無事不辦。卽事定也。起信論云。能觀心性。契理不動。卽理定也。故諸經論中。或單說事定。或偏說理定。學者隨軌一

文引據互斥。若此宗。必須二俱無礙。又必卽定卽  
慧。謂禪非智。無以窮其寂。智非禪。無以淡其炤。禪  
宗七祖云。卽體之用自知。卽知之體自寂。故次明  
眞智。今云冥一如者。能冥是慧。無心是定。卽契合  
本源。而無能契於事於理。無分別心。亦非無記。但  
不計有與不有。空與不空。一切皆不可。不可亦不  
可。此語亦不受。泯絕無寄於萬種紛動之法。本來  
自寂。何者。以心生故。一切法生。心若不生。法卽本  
寂。法華經云。諸法從本來。常自寂滅相。如在夢中。  
妄見百千萬衆。及乎覺悟。本來空寂。是知法生滅。



者。由心生滅。起信論云。心生則種種法生。心滅則  
種種法滅。今意明心但不生。體亦非滅。故諸萬動。  
本來自寂。無生滅也。○二明妙智者。海湛真智光  
含性空。卽定之智。故云妙也。文中兩句。皆有法喻。  
如海波浪澄渟。湛然不動。空無雲翳。廓爾清虛。大  
海傍無邊涯。連天一色。空徹海底。海含空天。由海  
虛明。故含空。由空明朗。故入海。以况眞智。識念不  
生。寂然不動。性無塵境。廓爾空寂。大智橫無邊涯。  
含性一味。性徹智體。智含空性。由智淨明。故含性。  
由性空寂。故入智。法喻一一相對。昭然可見。○三

明眞身。星羅法身影。落水者。由前理智冥合。故得一切諸法。無非法身。十方世界衆生。有發菩提心心識淨者。無不應現而爲說法。如秋天空朗。羅列星辰。萬器百川。不分而遍。晴空列宿。以喻法身。淨水澄川。以喻機感。法喻對合。理亦昭然。故大經云。菩薩清涼月。遊於畢竟空。衆生心水淨。菩提影現中。但彼以月喻菩薩。此將星喻法身。餘義同也。然應感相對。亦有四句。一。一星入一器中水。如一佛應一衆生。二。一星入一切器中水。如一佛應一切衆生。三。一切星入一器中水。四。一切星入一切

器中水。大疏云。皎性空之滿月。頓落百川。但得一  
二兩句。闕於三四。以月唯一也。此取星喻。義則備  
矣。○四明說本者。圓音非扣至心傳者。圓音者。一  
音中具一切音。一切音卽一音。或一音應一切音。  
皆圓音。出現品有十喻。喻如來圓音。言非扣而長  
演者。則常說遍說。不待機請也。如下教起十因中。  
第一法爾中辨。言果海離念而心傳者。果海離念。  
則非情識所解。旣絕所解。則言之不及。須亡言得  
意。得意卽是心傳。故別行十地經云。我今說一分。  
論釋云。十地有二分。一因分。二果分。以果分不可

說。但寄因分以明。故云一分。今言心傳卽傳說不及者。果分也。亦卽楞伽宗說二通中。宗通也。斯則句句言說而無說。念念智契而無契。無說無契者。常說常契也。○五明修證者。萬行亡炤至雙入。上句修。下句證。言亡炤者。有二意。一亡。則都息萬緣。爲定也。炤則炤真覺妄。爲慧也。二者炤亦都不當情。爲亡炤也。炤尙須亡。况於識念。然其本性。靈知不昧。故非斷滅。卽荷澤大師說。空寂炤爲自性戒定慧之意也。故疏主荅順宗皇帝心要云。無心於亡炤。則萬慮都捐。任運以寂。知則衆行爰起。放曠。

任其去住。靜鑒見其源流。語默不失玄微。動靜畢稱法界。皆萬行亡炤而齊修之意也。言漸頓無礙而雙入者。先釋漸頓。後銷疏意。初中法相宗云。從小入大爲漸。直從大乘發心爲頓。今則不然。卽以法相宗行位。地前伏惑。登地斷惑。分證真如。乃至等覺後心。金剛喻定。解脫道中。方始妙覺圓明。爲漸也。無相宗一向不說地位。如四卷楞伽第四卷中文云。十地則初地。初則爲八地。第九則爲七。七亦復爲八。第二爲第三。第四爲第五。第三爲第六。無所有何次也。已上竝是彼經文。如此超間。意顯

圓融之行。不依行布位次。又禪宗看淨拂塵。及諸家調伏心法。皆爲漸也。或說貪瞋卽是道。舉動無非佛。無證無修。皆爲頓也。然如上等文。各是一門之意。並非稱性圓證圓修也。今旣圓宗直談真界。則非漸非頓。隨緣修證。則具漸具頓。如經云。初發心時。卽得阿耨菩提。然始從十住十行。乃至等覺。妙覺。不壞行位。故具漸頓也。禪門悟卽刹那而登妙覺。一悟之後。念念相應。習氣唯微。本智唯瑩。具漸頓也。故荷澤大師開示頓悟漸修爲圓妙也。後銷疏意者。然隨緣說。有凡聖迷悟。故言漸頓緣起。

無性。舉體。但是真源。故云漸頓無礙。卽由無礙而  
漸頓。冥契妙極。故云雙入。問。據上所說。卽先頓後  
漸。一念頓悟而長時漸修。如何得成雙入。答。一念  
悟時。卽離染著。便是修行。一悟永悟。盡未來際而  
無間斷。修亦念念相應而無休息。故始終相收。皆  
名雙入。又問。此句是證。何故兼修說耶。答。上句是  
證之修。故云亡炤。此句是修之證。故云漸頓。又無  
礙無相。修證皆妙。故云雙入也。所以四十一位。位  
位成佛也。

○第五約器明非器不測

雖四心被廣。八難頓超。而一極唱高。二乘絕聽。

鈔雖四心被廣。至絕聽者。初二句約器也。上句應。

下句感言。四心被廣者。四心卽是四無量心。亦名。

四平等心。謂慈悲喜捨。緣境寬多。名爲無量。又此。

四心。皆具三緣。謂衆生緣。法緣。無緣。今畧明慈心。

三餘可準知。緣生與樂。名衆生緣。此一化益緣衆生無。

我。但是因緣。五陰法數。名曰法緣。觀彼陰空。名曰。

無緣。此二觀入又有一解。一生緣。緣於衆生。猶如父母。

妻子親屬。二法緣。緣於衆生。但是緣生。三無緣。不。

住法相。及衆生相。四心皆有此三。廣如涅槃梵行。



中說也。言八難頓超者。宿聞圓教。成金剛種。今生再聞。不簡凡聖。必亦能入。以對下二乘。多劫不聞此法。未發此心。故雖修行證果。亦不能入也。若準諸說。八難障於聖道。今明以圓教力。故障難之凡尙入。况無難之凡耶。况賢聖耶。卽以此經功力。超於諸教。昭然可見。言八難者。一。地獄。二。餓鬼。三。畜生。四。北洲。五。盲聾喑啞。六。佛前佛後。此是古說。若唐三藏新譯云。法前法後。後解勝也。七。世智辨聰。八。長壽天。故論云。三塗北長壽。前後辨聰根。此八名難者。以不堪受教。難入佛法中。故名之爲難。又

準教中有摧八難法。令發正願。不墮彼中。說有四輪。能摧八難。第一願生中國輪。能摧五難。但如法持戒用心。求生中國。若得生已。即便超卻地獄。餓鬼。畜生。北洲。及無想天也。第二願值善友輪。若得逢善知識。及蒙教導。聽聞正法。卽是摧卻法前法後難也。上至諸佛。下及凡夫解佛法者。於我有益。總名善友也。第三能發正願輪。摧卻世智辨聰難。謂若於三寶中起深信樂。常發正願。世世相續。卽能摧卻世智辨聰難也。第四種諸善根輪。能摧生盲生聾等諸根不具難。若能依佛正法。修行用心。

當來感得身相。諸根具足。便是摧卻諸根不具難也。所以頌云。善處摧前五。值願植餘三。卽是四輪能摧八難也。此八難有情不能入佛法中來。諸經論中無不此說也。若約華嚴圓教之力。亦得入佛法中。進修證果。故隨好品說地獄天子得生兜率。頓證十地。卽知地獄有情非障。故經云。佛子。我爲菩薩時。於兜率天宮。放大光明。名光幢王。照十佛刹微塵數世界。彼世界中地獄衆生。遇斯光者。衆苦休息。得十種清淨。眼耳鼻舌身意。亦復如是。咸生歡喜。踊躍稱慶。從彼命終。生兜率天。天中有鼓。

名甚可愛樂。彼天生已。此鼓發音而爲說法云云。爾時諸天子。聞說普賢廣大剋向。卽得十地等。由此卽知地獄非障也。又十地品云。雖住海水劫火中。堪受此法必得聞。言住海水者。龍等所居。卽畜趣非難。言劫火中者。若約通途說。劫火中無其有情。若約佛境界。佛力所持。變化施爲。及法威德力所加。卽得。如法華經云。衆生見劫盡。大火所燒時。我此土安隱。天人常充滿。乃至常在靈鷲山。及餘諸住處等。此多是法前法後難。謂劫火中不合有有情逢佛。豈得有聞法。今旣得其見聞者。卽難中

非難也。今此華嚴說。地獄畜趣。尙自得聞法。得證聖果。豈况餘類凡聖者也。故云。四心被廣。八難頓超也。又大疏云。見聞爲種。八難超十地之階。刊定記云。若乃具金剛種。雖八難而聞經。皆同此也。如出現品云。譬如丈夫。食少金剛。終竟不消。要穿其身。出在於外。何以故。金剛不與肉身雜穢而同止故。若於如來所種少善根。亦復如是。要穿一切有爲諸行煩惱身過。到於無爲究竟智處。何以故此少善根。不與有爲諸行煩惱而共住故。此少善根。性究竟故。此說稱性而修少善法也。○而一極唱

高二乘絕聽者。卽非器不測也。一極者。卽一乘至極之教也。如世歌詞。唱高則和寡。且巴歌一曲。和者百千。陽春白雪。和者一二。言二乘絕聽者。卽此品初。世尊入師子嚙申三昧。會中菩薩大衆。皆見逝多林及宮殿虛空三處。有種種莊嚴佛境界等事。又聞不思議等法。諸大聲聞。不見不聞。故經云。爾時上首諸大聲聞。大智舍利弗。神通目犍連。摩訶迦葉。具列十大弟子在逝多林。皆悉不見如來神力。如來巖好。如來境界。如來遊戲。如來神變。乃至亦復不見不可思議菩薩境界等事。何以故。善根不同故。

彼於過去。本不修習。見一切佛。種種神通妙善。根  
故。乃至云。本不會於生處之中。發阿耨多羅三藐  
三菩提心。故如是種種。皆是普賢智眼境界。不與  
一切二乘所共。以是因緣。彼諸上首大德。聲聞。不  
能聞。不能見。不能信。不能知。所以疏云。二乘絕聽  
也。又大疏云。若夫高不可仰。則積行菩薩。曝鰓鱗  
於龍門。深不可窺。則上德聲聞。杜視聽於嘉會。此  
則兼權教六度菩薩。亦絕聽也。故古讚云。最初佛  
入正受。定名師子。嚙申。大衆渴仰。生疑。念請法王  
開演。如來示相而答。意顯德用無涯。人法渾而何

分。因果齊歸法界。會中聲聞小果。權舉五百比丘。同處逝多園林。不覩如來嘉會。一則法門深遠。二則因非大心。三則自利亡悲。四爲失求勝果。今亦巧彰佛德。二乘淺智難知。意表圓教希逢。又顯不共之典。非但小乘不了。守權尙自高推。唯明普眼之境。非他劣見所窺。

○六指例顯當機益深。文中有四。一約人以顯益。二約法以顯益。三始末交徹以顯益。四得失相對以顯益。今初

當其器也。百城詢友。一道棲神。明正爲南。方盡南矣。



益我爲友人。皆友焉。

鈔當其器者。卽善財童子。指此爲例。依教皆然。故彌勒云。若有敬慕心。亦當如是學。百城詢友者。但舉圓數。其實一百一十城。詢問善友也。故八十經初云。爾時善財童子。依彌勒菩薩摩訶薩教。漸次而行。經遊一百一十城。已到普門國。思惟觀察。一心願見文殊師利。一百一十。表十地及等覺。一一皆具諸地功德故。或不分等覺。卽開十信。進退皆表一百一十。此宗三賢行相。不殊十地。故不別表。所謂初住。初行。初廻向。初地也。二三乃至十住。十

地行相皆然。此依大疏辨也。一道棲神者。棲託心神也。一道有三義。一唯向南。二唯一因一果。三萬聖千賢皆修萬行。更無異路。二皆一道義也。明正爲南者。謂善財始自發心。福城東見文殊。便漸次展轉。一向南行。歷諸善友。明者以南主火。是陽是明。北主水。是陰是闇。正者不住東西二邊。東左西右。故是邊。當南北中正之道。表求法者背闇向明。離邊當正。故云明正。更有三義。一一方已有多友。餘方例然。二南主生長。表求法者生長善根故。三西域居人宅多東向。願日月轉。表於善財。願人法故。故舊

疏云。善財求友。表隨順以南行。方盡南矣。方是假法。原無定體。東西南北。相待立名。但取明正之義。所向盡名爲南。如此。始名悟入法界。故善財至寄十地之友。多在菩提道場。又不言卻廻向北。故知若觸向明正。一切皆南也。益我爲友人。皆友焉者。有二義。初隨相說。二稱性說。隨相說者。謂見善者。生不及之心。見惡者。發揆湯之智。旣三人同行。必有我師。况多者也。但能擇善者從之。不善者改之。則觸向皆師也。又見賢而思齊。卽爲益也。或見不賢而內自省。亦爲益也。又老子云。善人是不善人。

之師。不善人是善人之資。皆是益我爲友之義。故人皆友焉。二稱性說者。夫法界圓宗。觸類成教。但因之生解。卽名爲師。如推一塵。見具無邊之德。塵卽是師。所以善財再遇文殊智炤無二之後。便遇三千世界微塵數善友知識者。意在茲焉。

○二約法以顯益

遇三毒而三德圓。入一塵而一心淨。千化不變其慮。萬境順通于道。

〔鈔〕遇三毒而三德圓。至順通于道者。三毒成三德。有通有別。通者。三毒本空。元是三德。迷情執取。以

德爲毒。今悟則貪無貪相。元是戒也。瞋無起滅。本自寂然。元是定也。故法句經云。戒性如虛空。又云。瞋心等陽燄。癡無癡相。是爲慧也。又心王經說。三藏云。貪相不生。是爲戒藏。瞋相不生。是爲定藏。癡相不生。是爲慧藏。諸法無行經云。貪欲卽是道。恚癡亦復然。如是三事中。有無量佛法。是知迷爲八萬四千塵勞門。悟成八萬四千波羅密。塵勞雖衆。根本不過三毒。波羅密雖多。根本只是三德也。別者。卽善財所遇善友。其類不同。表一切類中。皆有法門。今後學者。於人不觀種性。於法莫存取捨。故

婆須密女。示貪欲之相。所以隣里生疑。抱持啜吻。皆獲功德。其所得法門。名離貪欲際解脫門。無厭足王。示其瞋相。傷煞無量衆生。所得法門。名如幻解脫門。勝熱婆羅門。四面火聚。中有刀山。令投身入中。向上兼日。五熱炙身。示現外道癡迷邪見之相。善財見之。所得法門。名般若波羅密。普莊嚴解脫門。三毒之相。尚有法門。况餘類耶。是知契合華嚴圓教。婆須夢水而不溺。無厭恚火而不燒。勝熱邪見而不侵矣。言入一塵而一心淨者。有二義。一以情念爲塵。念卽無。故淨也。二卽微塵。塵體稱性。

故淨也。一塵一念既爾。千心萬境總然。故次云。千

化不變其慮。故心要云。心心作佛。無一心而非佛心。萬境順通于道

也。卽處處道成。無一塵而非佛國。

○三始末交徹以顯益

契文殊之妙智。宛是初心。入普賢之玄門。曾無別體

〔鈔〕文中二。一始終。二本末。今初。契文殊之妙智者。

卽善財歷諸善友。再遇文殊。當智炤無二相。契合

本心。絕能所相。故不見身。但遙申右手。摩頂得法。

義在下五相中解也。宛是初心者。最初在福城東

得見文殊。表信智。今又見文殊表證智。意明信證

雖說始終。智體元來不別。所以皆是文殊。如第二十信會。在普光明殿說。第七因圓果滿。重會普光。亦表證極。不離初心。正同此也。故大疏云。啓明東廟。智滿不異於初心也。○二本末入普賢之玄門。曾無別體者。善財求友。最後至普賢菩薩處。微細觀察普賢之身。見一一毛孔中。有不可說不可說佛刹海。云云乃至善財所見佛刹微塵數諸善友。往詣親近。積集智慧。比此暫見普賢所得境界。百分不及一。乃至優波尼沙陁分亦不及一。善財從初發心。乃至普賢。於其中間所入刹海。相續不斷。今



於普賢一毛孔中。一念所入。過前不可說不可說  
倍。如一毛孔。一切毛孔。一一相好。一一支節。悉亦  
如是。善財於普賢毛孔剎中行一步。至不可說不  
可說佛刹微塵數世界。如是盡未來際劫。猶不能  
知一毛孔中種種剎海。種種佛海。種種菩薩衆會  
海。如是等海。皆悉不知。究竟邊際。故云玄門也。然  
不離一心。一性。一毛。一塵。故次云。曾無別體。又經  
最後結云。善財則得普賢行願海。與普賢等。與諸  
佛等。一身充滿等。正覺現前等。乃至不思議解脫  
自在。悉皆同等。既前後橫豎皆等。何有別體。故大

疏云。寄位南求。因圓不逾於毛孔也。

○四得失相對以顯益

失其旨也。徒修因於曠劫。得其門也。等諸佛於一朝。  
〔鈔〕失其旨也。至於一朝。有二義。一通相而言。由此  
經境界。一念一塵。皆全收法界。故一念失則全乖。  
曠劫修而無益。一念得則全契。利那證而無遺。若  
指經文。則出現品意。簡權教六度菩薩非器。對前  
二乘絕聽。則積行菩薩曝鰓鱗於龍門之意。經云。  
設有菩薩。於無量百千億那由他劫。具行六波羅  
密。修習種種菩提分法。若未聞此如來不思議大

威德法門。或時聞已。不信不解。不順不入。不得名  
爲真實菩薩。以不能生如來家故。卽前句云。若聞  
徒修因也。此法信順悟入。當知此人生如來家。具足一切諸  
菩薩法。遠離一切諸世間法。漢入如來無量境界。  
卽後句云。等諸佛也。故大疏云。良以有作之修。多劫終成敗  
壞。卽前句也。無心體極。一念便契佛家。卽後句也。故知無念  
爲宗。實爲妙也。旣得意。失意懸殊。誠見此經大益  
也。

○三結歎

杳矣。妙矣。廣矣。大矣。實乃罄諸佛之靈府。拔玄根之

幽致。升慧日以廓妄。扇慈風以長春。包性相之洪流。掩羣經之光彩。豈唯明逾朝徹。靜越坐亡而已矣。

鈔文三。初以四德名歎。次以六德義歎。後形外義結。今初○杳矣。妙矣。廣矣。大矣。杳冥。微妙。德相。意也。廣則業用。大則體性。○次以六德義歎。實乃等是。一諸佛靈妙所集之都府。如千珍萬寶所集之庫藏。唯此經罄而竭之。無有遺隱。二玄微妙理。根淡難見。唯此經剖而出之。明以示人。故云拔也。三日出而雲霧散。慧發而妄想除也。四陽和炤物。遠近齊敷。枯木不生。過時則已。佛慈利生。平等普度。

闡提不受。窮盡未來。又陽氣所滋者。後終凋落。佛  
慈所度者。究竟涅槃。有此兩重之意。故云長春也。  
五涓涓滔滔。無流不納。大海也。若性若相。無義不  
詮。大經也。大疏云。千門潛注。與衆典爲洪源。萬德  
交歸。攝羣經爲眷屬。六杲日麗天。奪衆景之耀。衆景  
卽月與星辰也。圓宗布世。掩羣經之輝。羣經卽權教二乘也。○後形  
外義結。豈唯明逾朝徹等者。莊子中事。此有二意。  
總意云。尙掩諸經。况於外典也。言朝徹者。莊子第  
三。南伯子葵。問乎女偶曰。子之年長矣。而色若孺  
子。何也。曰。吾聞道矣。子葵曰。可得學耶。曰。惡惡可。

子非其人也。夫卜梁倚。有聖人之才。而無聖人之

道。偶曰。我有聖人之道。而無聖人之才。吾欲以教

之。庶幾其果爲聖人乎。

注云。聖人之才。謂其有慧。聖人之道。謂其有真。以真

教之。能成彼之道矣。

吾守之三日。而後能外天下。

謂亡天下事也。已

外天下矣。吾又守之七日。而後能外物。

物。謂凡有物象。已

外物矣。吾又守之九日。而後能外生。

不見是身。何生之有。已

外生矣。而後能朝徹。

不有萬物。唯真獨存。如朝日升明。洞徹無碍。人皆有此。不

能自知。

朝徹而後能見獨。見獨而後能無古今。無古

今而後能入不生不滅也。言坐亡者。亦莊子第五。

顏回以契道之言白。夫子曰。回益矣。仲尼曰。何謂

也。曰。回亡仁義矣。仁即不周。義則不及。曰。可矣。猶未也。他日

復見曰。回益矣。曰。何謂也。曰。回亡禮樂矣。禮過則煩。樂則

心動。曰。可矣。猶未也。他日復見曰。回益矣。曰。何謂也。

曰。回坐亡矣。仲尼蹙然曰。何謂坐亡。曰。回隳支體。

黜聰明。離形去知。同於大通。此謂坐亡。心靜為坐。物空為亡。

仲尼曰。回果至賢乎。丘也從而後矣。今疏意云。據

諸教所詮鑒用之智。寂滅之理。早以逾於朝徹之

明。坐亡之靜。若以華嚴圓妙之旨。不唯超彼而已。

兼諸權教小乘。亦皆超越。故有豈唯而已耶之言

也。第二別歎此經以申旨趣竟

○第三教起由致慶遇希奇。文中二。二明昔翻未具。二明今譯多具。今初

然玄籍百千。幽關半掩

鈔言玄籍者。玄妙典籍也。百千者。卽下本經十萬偈也。言幽關半掩者。謂晉譯二萬六千偈。唐加九千偈。成四萬五千偈。經來未具。故幽微關鍵之教而半掩也。

○二明今譯多具

我皇御宇。德合乾坤。光宅萬方。重譯來貢。東風入律。西天輸越海之誠。南印御書。北闕獻朝宗之敬。特回



明詔再譯真經。光闡大猷。增輝新理。澄觀顧多天幸。  
欽屬盛明。奉詔譯場。承旨幽贊。扑躍兢惕。三復竭愚。  
露滴天池。喜合百川之味。塵培華嶽。無增萬仞之高。  
〔鈔〕我皇御宇下。但展法界品二十一卷。成四十卷。  
亦未全足。故云多具。文中三。一明聖朝德化廣被。  
爲譯之緣。二明外國遠獻梵本。是譯之因。三正明  
詔命。述譯讚之相。今初。○我皇御宇德合乾坤者。  
謂臨御區宇。德合天地。乾天坤地。光宅萬方者。尙  
書堯典篇云。昔在帝堯。聰明文思。光宅天下。孔安  
國注云。謂聖德之風遠著。今意云。風光遠及。以天

下爲宅也。今我德宗皇帝。德及外國。故彼以華嚴  
梵本來貢也。重譯來貢者。夫外國貢獻經歷數國。  
卽展轉譯語。從一國至一國。乃至於此。故云重譯。  
如獻白雉。九譯至此也。○二明外國遠獻梵本是  
譯之因者。東風入律。至朝宗之敬。言東風入律者。  
漢武帝十洲記說。西胡月氏國。遣使遠進三種物。  
謂小師子。續弦膠。反魂香。經半年。不問此事。使者  
因隨帝入苑射。帝弓弦斷。使者曰。何不取續弦膠  
續之。遂取膠糝之。果如其言。帝曰。彼君有此。何以  
遠貢。使者曰。臣國去此三萬里。國有常占者。見東

風入律。十旬不休。連月不散。占者云。東有好道之君。遂令遠獻也。西天輸越海之誠者。既皇帝德風及於西天。故彼輸奉過海之忠誠。遠貢經本。如昔三物也。南印者。都望天竺。卽是此國之西。就彼五天。卽是南印土也。御書者。彼國表云。手自書寫大方廣佛華嚴經百千偈中所說善財童子親近承事佛刹微塵數善知識。行中五十五聖者。入不思議解脫境界。普賢行願品。謹奉進上等。北闕獻朝宗之敬者。百川朝宗於海。萬國朝宗我唐。故以獻經而申遠敬。○三特回明詔下。正明詔命。述譯讚

之相。於中三一。聖垂詔命。二慶承詔命。三譯讚之相。今初。但是展演舊經入法界一品。故云光闡大猷。及增輝也。猷。謂嘉猷。嘉美之德也。○二慶承詔命。澄觀顧多天幸。至幽贊者。反顧我有天然之幸。得遇盛明之時。奉詔譯經製疏也。○三譯讚之相。拈躍至之高者。拈。謂手舞。躍。謂足蹈。兢。謂戰戰兢兢。惕。謂悚惕。三復竭愚者。謂再三反復。竭盡其心。不敢孟浪也。謙故曰愚。然三復之言。卽論語云。南容三復白圭。謂毛詩云。白圭之玷。尚可磨也。斯言之玷。不可爲也。意謂圭玷可以磨治。若過言一出。

駟馬追之不及。南容讀詩至此。再三反復。以將誠  
慎其言也。今用此意。露滴天池者。智度論中。指海  
爲天池。意云。製疏譯經。一言一義。得契佛心。如露  
滴海也。塵培等者。卽子貢對魯哀公讚夫子之言。  
謂哀公問子貢云。汝師賢乎。對曰。賢。哀公曰。賢復  
如何。答曰。不知。又問。何以不知。子貢曰。吾於夫子  
門下。如人終日戴天。不知天之高。終日履地。不知  
地之厚。飲海知飽。安知其深。哀公曰。譽師太過歟。  
子貢曰。捧土培山。寧有益。仞。七尺曰仞上皆謙詞。

第三教起由致慶遇希奇竟

○第四畧釋總題令知綱要

大方廣所證法也。佛華嚴能證人也。極虛空之可度。體無邊涯。大也。竭滄溟之可飲。法門無盡方也。碎塵刹而可數用。無能測廣也。離覺所覺。朗萬法之幽邃。佛也。芬敷萬行榮耀衆德。華也。圓茲行德。飾彼十身。嚴也。貫攝玄妙以成眞光之彩。經也。總斯七字。爲一部之宏綱。則無盡法門。思過半矣。

〔鈔〕於中三。一標名。二釋名。三結歎。今初可知。○二釋名者。極虛空至經也。極虛空等三句。卽普賢偈讚佛德結歸無盡之文云。刹塵心念可數知。大海

中水可飲盡。虛空可量。風可繫。無能盡說佛功德。  
今取虛空釋體大。海水釋相大。塵刹釋用大。唯不  
取心念及風也。碎塵刹者。碎塵數之刹。並爲微塵  
也。離覺等者。能覺卽菩提。所覺卽涅槃。故楞伽云。  
一切無涅槃。無有涅槃佛。亦無佛涅槃。遠離覺所  
覺。旣理智俱泯。能所兩亡。始本不二。是究竟覺。故  
雖俱離。而朗炤萬法之無遺。非一向同楞伽也。芬  
敷萬行者。草木感果之花也。榮耀衆德者。草木兼  
通金玉莊嚴之華也。圓茲行德。飾彼十身者。雙以  
二華二德。嚴飾佛身也。貫攝等者。貫穿攝持玄妙

之義門。門門煥爛。無量無邊。門門尋之。一一皆徹。佛智如尋影。以至於本。故大經云。如因日光。照還見於日輪。然以智慧光。通達於佛智。佛智體如日輪。演無量義如日光。○三結歎者。總斯七字等。尙書云。若網在綱。有條而不紊。紊者亂也。孔氏序云。舉其宏綱。撮其機要。思過半矣者。周易繫辭文勢。孔子云。學者觀其彖辭。是以盡過半之思。今意云。若解七字之義。卽一部之功。已過半矣。

第四畧釋總題。今知綱要竟。四分大科中第

一總標大部名意竟



林泉比丘興燈敬捐貲刊刻  
 華嚴普賢菩薩行願品別行疏鈔纂要  
 第一卷上薦師祖大殿梁公業卸塵勞  
 神遊華藏繁興萬行具普賢之願王圓  
 悟一真入毘盧之性海供養諸佛於利  
 利塵塵廣度含生於在在處處四恩普  
 報三有均資法界有情同圓種智  
 康熙庚申仲秋  
 華藏室謹題

大方廣佛華嚴經普賢行願品別行疏鈔纂要卷第

一百之十七

吳麟生  
熊子丕  
全鐫